

清初名儒年譜

陳祖武先生選
清人年譜系列

◎本社影印室 輯

◎北京圖書館出版社

陳祖武先生選
清人年譜系列

◎本社影印室 輯

◎北京圖書館出版社

清初名儒年譜

①4

翁鐵庵年譜

常熟 翁叔元自敘

明崇禎六年歲次癸酉三月二日丑時叔元主於常熟
縣城東醋庫橋祖居時先君肄業南京國子監夢神人
扶老僧至門謂先君曰子汝爲子夢時漏下五鼓叔元
產時也先一夕先妣亦夢大士子梅檀香一片懷之以
歸先君因命名曰梅字之曰寶林

七年甲戌叔元二歲是歲八月先王母張太夫人卒叔
元初生先王母極憐愛之顧謂先妣曰此兒相頗異吾

慮汝福薄不及見其成立也

八年乙亥叔元三歲先妣以星家言叔元命宜出繼因
寄名於母舅工部員外趙南屏公南屏公愛之如己出
九年丙子叔元四歲先君抱懷中日指識一二十字過
目不忘

十年丁丑叔元五歲

十一年戊寅叔元六歲先君於四月二十五日病卒叔
元自外入見先君仰臥于地指問乳媼曰爹何爲者媼
給曰爹睡又問姆何爲哭曰爹睡不醒故哭叔元俯伏

尸旁以手按先君之面不爲動乃大哭曰爹不醒矣蓋平日先君時時抱置膝上以舌舐面爲笑樂今不復然故哭初不知先君死也大斂後始日夜啼號索爹所在先妣悲痛淚盡而血氣絕者再親族人見之無不泣下者

十二年己卯叔元七歲就外傳兩月能背誦孝經大學中庸及唐人絕句三十餘首延僧爲先君禮梁皇懺叔元隨衆朗誦音韻和洽又能擊木魚一字一擊無少疾徐諸僧異之晨昏爲先君上祭先妣哭叔元隨以哭先

妣爲之忍淚不敢發聲

十三年庚辰叔元八歲晨起念佛千聲誦觀音經一卷
然後就塾每夜禮佛二十四拜跪誦發願迴向文一週
如是三年無闕是歲三月叔元出痘先妣晝夜視衣不
解帶叔元目忽上指氣絕先妣聲喚家人婦爭環叫良
久乃甦有遺腹妹未二期時亦出痘遽驚死以先妣急
叔元無暇顧妹也

十四年辛巳叔元九歲定姻于錢氏先叔祖朔州守昇
字公主之也

十五年壬午叔元十歲先君自少不問生產樂善好施
食餒衣寒櫓死埋殮惟日不足有田數頃屋一區強半
斥賣以供施予迨先君歿家已蕩然先妣煢煢婦撫
三孤子持門戶手口卒瘞朝不計夕至是已四年矣又
歲大旱斗米千錢母子四人日饜糠覈不繼則剝取榆
皮以食親族中無哀憐之者

十六年癸未叔元十一歲先妣寢疾患背寒叔元晝夜
侍以口貼先妣之背用力呼吸之七日而愈至今夢中
猶時作呵背狀哭而醒

十七年甲申叔元十二歲是歲流寇陷北京中外騷動
福王卽位南京蘇松盜賊羣起叔元母子避兵于李壑
國朝順治二年乙酉叔元十三歲五月王師下江南
蘇松諸郡皆望風納款惟江陰崑山常熟三縣未下城
內洵洵爭揭竿爲拒守計訛言誠意伯劉孔昭總兵胡
龍光擁義陽王恢復南京世父子厚公謂先兄咏曰郡
縣卽日底定汝母子城居可以無恐叔元告先妣曰聚
一邑烏合之衆欲抗王師立見屠戮亟入鄉避之無
聽伯父言哀哀孤寡一旦城破爲齏粉矣先兄尚猶豫

叔元號哭母前母爲心動遂於閏六月二十一日出避於西鄉之沙堰七月十三日先兄以中元節勸母入城祭先祠叔元阻之不能亦偕往舟行五六里至溧塘鄉民爭奔竄問故曰清兵蔽江下過三十里鋪矣因亟返棹甫抵村舍遙望城中火光燭天銃礮聲震地次早城破城中人無得免者世父一門皆被殺事平後親族人咸謂叔元十三歲童子能審時勢決去住免母兄弟于難知過于人遠也未幾鄉民復訛言大兵將入村鄉肆掠村民扶老攜幼爭西竄叔元曰此近地之民欲爲亂

耳非大兵也然吾母驚甚不能止因走無錫縣之懷仁鄉夜行晝伏備歷艱苦數日乃定復歸沙堰有瘠田數畝茅屋三間母子依以居後叔元奔走四方家室露居荒村卽此地也

三年丙戌叔元十四歲時江南新定盜賊所在蜂起皆以白布圍腰間名白腰兵常熟之西鄉尤甚又避亂于東鄉之李墅凡四閱月始入城返其故居

四年丁亥叔元十五歲家貧不能延師又經兵火流離播遷廢書不讀二載矣長兄林應御史院試入學叔元

于是駸駸有向往志就隣舍生孫君求示作文法予以
先輩程墨二十篇慶歷小題文三十篇與弟楷受而讀
之各信筆作學而時習題開講數語孫君大異之自是
始一意讀書

五年戊子叔元十六歲五月赴御史院試弟楷入學叔
元黜不收乃益發憤讀夜漏下三鼓始就寢五鼓披衣
起日作文二三義先妣憐余弱禁無夜讀叔元闇誦不
令母知起是歲九月朔日盡明年十二月朔凡十五閱
月都所作文得七百二十首

六年己丑叔元十七歲府縣季試學博士月試皆冠軍
時家益貧日或不舉火夏夕苦蚊叔元插竹于枕旁覆
以紙蚊不能至面母子四人乃得寢是歲十二月叔元
贅錢氏時舊居已折入子錢家先妣及伯兄咏借世父
子安公東郊屋三楹以居季弟楷寄棲生母家叔元出
贅不能具襍被內母時時詬諍居數日先妣就隣舍一
見新婦婦泣語叔元曰姑貧至此何所得食脫簪珥質
錢密餽送之

七年庚寅叔元十八歲叔元日一至母所婦私製餅餌

或米少許納叔元袖以餉姑伯兄負官錢爲隸迫索貸
世父犀銀杯各一將以質典乘小舟至城手犀杯把玩
墜杯于河撈不獲哭于河濱叔元歸以室人衣質四金
爲兄完官內母聞之日夜詈辱其女女幾自經是歲叔
元應御史院試補博士弟子御史中州李莪居先生也
八年辛卯叔元十九歲館於錢子慕所歲得館穀十二
金供先妣饘粥又貸友人金賃城南屋數廛奉母兄同
居先是客歲冬先妣臥病執叔元手言曰汝贅外家新
婦賢不得共晨夕汝兄弟能餽一椽俾母子姑媳合并

死不恨矣於是遷居之夕先妣爲開顏進飯一匙甫浹月而病劇醫藥不愈有言上海縣太平鄉陳和尚者施藥起痼疾有奇效因留長兄侍母叔元偕弟楷往乞藥兼程往還而母棄世已二日旣小殮顏色如生叔元一慟而絕家人以熱水灌口踰時乃甦叔元不肖不能養母母歿又不能視含殮爲天之僂民沒身之痛也是歲六月長女生

九年壬辰叔元二十歲叔元以哭母失血肌肉盡削自分必死長兄刺血書疏投城隍神乞減已算活弟叔元

聞之悲悼不寧兄曰病死貧餓死等死耳弟在可以成
先人志吾無所用不如死也相抱而哭是歲奇荒無所
得食叔元家五口日食米三合雜以菜根糠覈猶或不
繼則僵臥終日不爲餓殍幸也除夕不能舉火將乞貸
親友出門過跨塘橋徘徊四望無一可控告者悵然而
歸夫婦相對泣受業師孫雪屋先生知其狀遺米三斗
乃得卒歲

十年癸巳叔元二十一歲有族叔延爲塾師意不在課
子也其平居以武斷爲事欲因之以謁官長索鄉里叔

元曰此豈士君子所爲亟辭之叔恨甚過於道幾飽老
拳是歲從太倉陳確庵先生受業予大學課程每日記
所行事及敬怠分數五日一告天是歲十一月次女生
十一年甲午叔元二十二歲七月偕長兄赴省門就學
使者錄遺試不收游弘濟寺登燕子磯覽石壁海闊天
空四字雖然有遺世之想告長兄曰父母旣歿家徒四
壁立無可繫戀二幼女以長以嫁惟兄撫之弟從此逝
矣兄不可且繼以泣重違其意乃隨之歸

十二年乙未叔元二十三歲館周氏已二載矣仲夏血

症復發辭以歸有同母姊適華氏居無錫鷺湖之濱乃
往依焉凡五閱月有僧寂如邂逅於南橋與之相唱和
得詩數十首以歸

十三年丙申叔元二十四歲學使者張西山先生按部
試士拔叔元一等三名補廩膳生是歲九月世父子安
公病卒遺孤鳳來年甫十三里中豪者構難欲因而蠶
食之叔元奮不顧身爲之禦侮豪者計沮乃免

十四年丁酉叔元二十五歲與同里繆清璘淵趙令卿
胡德陳鄴仙協陳顒士令聞時彥龍乘陸日華曜陸子